

## Mahisa tsghatá lwa Pwal ña 2 Timute

### *Ga zgu*

<sup>1</sup> I' Pwal ta vindaftá na defteri na. Nda nza yu ka mnda ghunay Yesu Kristi, manda ya kumaf Lazglafta. Nda fa yu ña mna gwada ña mnduha ta ghəña gwada ta hafu, ya tanaf Lazglafta ta imi ta sləməñ ta gwal ta ndi'aftá vgha nda Yesu Kristi.

<sup>2</sup> Ña kagha Timute\* zwaña da, ya ta dvu yu ta vindaghafta yu. Ka vlaghavla Da mu Lazglafta nda Yesu Kristi Mghama mu ta zďakatahudani, nda tawa hidahidani, nda zďakwani tani.

### *Rfay Pwal ta Lazglafta*

<sup>3</sup> Ta rfay yu ta Lazglafta ta ghəña kagha. Ñani ta maganata yu ta slna nda ñudufa da turtuk, manda ya si ta maganata† dzidziha da. Inda fitika magay da ta du'a da Lazglafta nda fitik tani nda rvidik tani ya ná, ta havay yu ta kagha. <sup>4</sup> Havakta da ta fitika mbəzay gha ta ima taw ná, ta mamay yu katakata ta nghəglanťá kagha, kada ndəghafta ñudufa da nda rfu. <sup>5</sup> Ta havay yu, ya káka zlgħafta kahwathwata nda ñudufa gha ta Yesu Kristi. Tsa zlgħay nda ñuduf ya ná, tiñəl midza gha Luwis ta zlgħafta, ka fiñťá ma gha Unis. Grafgra yu kazlay: Zlgħafzlgħa kagha guli kə'a. <sup>6</sup> Tsaya ta kəl yu ka havglaghakta, yaha ka da wudñťá skwi ya vlagha Lazglafta, ma fitika faghaghata da ta dzvu ya. <sup>7</sup> Sulkum ya vlama Lazglafta ná, ña zbukwa vgha a wa. Katək ná, ta mbrə nda mbra ta amu. Ta vlamavla ta dvu nda ksanatá ghəñ.

\* 1:2 Ngha ta Slna gwal ghunay 16:1. † 1:3 Ngha ta Filipiya 3:4-5.

<sup>8</sup>Yaha ka da hula mna gwada ta Mghama mu. Yaha ka da hula mna gwada ta i'i tsam lu ma gamak ta gwada ta tsatsi ya guli. Katək ná, zlg hafz lgha ta ghuya danwa kawadaga nda i'i ta ghəŋa Lfida Gwada, nda fata ghəŋ ta mbraku ya ta vlə Lazglafta. <sup>9</sup>Tsatsi ta mbamafta. Ka hgaftá tsi ta amu ŋa nzakwa mu ka mnduhani. Nza a kabga vəl magata mu ta skwi dina wu, ama mantsa ya kurata tsi nda zɗakatahudani. Tsa zɗakatahudani ya, vlamavla lu nda ma Yesu Kristi ma kɗaku lu ka fatá ghəŋa haɗik. <sup>10</sup>Ka maravatá tsi ndana tama nda ma zlagapta Yesu Kristi, mnda mba amu. Tsatsi ta kliŋtá mbrakwa mtaku, ka maramata nda ma Lfida Gwada ta tva nzaku nda hafu ŋa kɗekedzeŋ.

<sup>11</sup>Ŋa mna tsa Lfida Gwada ya ŋa gwal kul nzakway ka la Yahuda fata Lazglafta ta i'i ka mnda ghunay, ka taghay† ɗa ŋa taŋ. <sup>12</sup>Ta ghəŋa tsaya ta kəl yu ka ghuya na danwa na. Ama ksa a hulani ta i'i wu, kabga nda sna yu ta mndu ya faf yu ta ghəŋ tida. Grafgra yu guli kazlay: Mamu tsatsi nda mbraku, ŋa ŋanata tsa Lfida Gwada faɗim tsi ma dzvu ya ha ka sagha fitika tsa guma kə'a.

<sup>13</sup>Ka nza kahwathwata gwada ya snaŋ ka da i'i ka skwi ŋa klay gha ta sadani. Ka nzamta ka ma zlg hay nda ŋuduf, nda ya ma ɗvu ya vlama Yesu Kristi. <sup>14</sup>Ŋanaŋa ta ŋərma tagha skwi ya faɗham lu ma dzvu, nda mbrakwa Sulkum nda ghuɗa, ya ta nzaku ma amu ya.

<sup>15</sup>Nda sna ka kazlay: Zlidivazla inda gwal ta haɗika Asiya kə'a. Tekw i Fizel nda Hermuzena mataba taŋ. <sup>16</sup>Ka maranaŋmara Lazglafta ta tawa hidahidani ta ghəŋa həga ga Unesifura, kabga si ta gɗagɗa ta ksidiŋtá ŋuduf. Ksaf a na tsatá i'i ma gamak na ka hula wa. <sup>17</sup>Katək ná, ma ɓhagaghatani da luwa Ruma, ka zbə tsi ta i'i ka ŋɗanɗa,

---

† 1:11 Gray nda 1 Timute 2:7.

ka slaftá tsi ta i'i. <sup>18</sup> Má ka vlarvla Mgham Yesu Kristi ta mutsaftani ta tawa hidahida Lazglafta badu fitika tsa guma. Mal kagha guli nda sna ta katu ya katiha tsi ma nzakwa dá ma luwa Afisus.

## 2

*Nzanza ka vordaka sludza Yesu Kristi*

<sup>1</sup> Kagha tama zwanja dá, mbra ta vgha ma zdakatahudi vlama lu ma Yesu Kristi. <sup>2</sup> Skwi ya snanj ka da i'i ta kama ndoghata maslæmtsækha ya, taghanaftagha ta njërma mnduha ta laviŋtá taghanaftá sanlaha guli.

<sup>3</sup> Su'a ta ghuya danwa ta slagghagata ta ghəŋa gwada ta Yesu Kristi, manda ya ta su'u vordá sludzi. <sup>4</sup> Ka ta ga sludzi mndu katsi, had ta laghwi da famtá ghəŋani manda ya ta magə hamata mnduha, ka ta kumay tsi ta zdanaftá njudufa malani wa. <sup>5</sup> Manda tsaya mndu ta hwaya guli. Ka hwaya a tsi ta tsa hwaya ya nda tvani\* wu katsi ná, mutsaf a ta nisəlani wa. <sup>6</sup> Mndu ta njavata ka hva guli ná, tinjəl tsatsi ta za yakwani. <sup>7</sup> Ndana ta skwi ta mnaghata yu. Ka ta ndanay ka katsi, dza'a vlaghavla Lazglafta ta tva snatá inda skwi.

<sup>8</sup> Havakhava ta Yesu Kristi, tsatsi ta nzakway ka zivra Dawuda, tsatsi ta sli'agapta nda hafu mataba gwal nda rwa, manda ya ta taghə na Lfida Gwada ya ta mnə yu na. <sup>9</sup> Taghəŋa tsa Lfida Gwada ya ta ghuya yu ta danwa ha ka tsamtá i'i ma gamak manda mndu ta magatá ghwadaka skwi. Ama dər má mantša tsi, hbam a lu ta gwada Lazglafta wa. <sup>10</sup> Tsaya ta kəl yu ka su'a inda skwi, njə mutsafta gwal zabap Lazglafta ta dakwa tan, kada mutsafta hahəŋ guli ta mbaku ta nzakway ma Yesu Kristi, njə nzakwa tan ma glaku kul had kdavaktani ya. <sup>11</sup> Nana gwada dza'a yu mnay na ná, gwada nda ra ya.

\* 2:5 Gray nda 1 La Kwareŋt 9:24-27.

Ka mtumta mu kawadaga nda tsi, dza'a nzakway mu nda hafu kawadaga nda tsi guli.

<sup>12</sup> Ka ta su'ay mu ta ghuya danwa kawadaga nda tsi, dza'a gay mu ta Mgham kawadaga nda tsi guli.

Ka sna a nni ta kagha wu ka mu nda tsi, sna a yu ta kaghuni guli wu, ka'a dza'azlay nda amu.

<sup>13</sup> Ka dar nza a mu ka njerma mndu tawa irani wu, tsatsi tani, ta nzakwani tsatsi<sup>†</sup> ka njerma mndu, kabga laviŋ a tsatsi ta mnay kazlay: Sna a yu ta kagha wu ka'a nda ghonani wa.

*Mna ta vordaka gwada Lazglafta*

<sup>14</sup> Havanakhava ta tsa skwiha ta mnaghata yu ya ta sanlaha. Mnanamna ta hon ta koma Lazglafta, ka zlanja hon ta zlerdawi ta gheja gwadaha. Had sana skwi ta katanja tsa zlerdawi ya ta mndu wu, ta gheja zadintá gwal ta snay yeya katok ta zadinja tsi. <sup>15</sup> Kagha, navaŋa ka nzakwa ka ta koma Lazglafta ka mndu nda ndaha, ka mnda maga slna kul had hula ta ksafu ma slnani, ta mna vordá gwada nda tvani. <sup>16</sup> Ma fa ka ta wa gha da gwadaha ka betbet kul ksa vgha nda zlghey nda nuduf, kabga gwal ta famta gheja tan da mnderga tsa gwadaha ya ná, ta sgaku nda sga di'inghuta tan nda Lazglafta. <sup>17</sup> Gwada ma wa tan guli ná, manda tsakwa gurdza nzakwani. Tekw i Himene<sup>‡</sup> nda Fileta mataba tsa mnduha ya. <sup>18</sup> Zluzla hon ta tva kahwathwata. «Nda ghada luta sli'agapta ma mtaku,» ka hon ta mnay. Mantsa ya ka hon ta zlabintá sanlaha ma zlghey nda nudufa tan. <sup>19</sup> Tsaw tsa dihatá dughwanja skwi thaf Lazglafta ya ná, gigidavaf a wa. Wya ka lu vindafta ta tsa dughwan ja: «Nda sna Mgham

---

<sup>†</sup> 2:13 Aya 11-13: Gray nda Ruma 6:8, Mata 10:33 nda Lukwa 12:9, Mbsak 23:19. <sup>‡</sup> 2:17 Himene: Ngha ta 1 Timute 1:20.

Lazglafta ta gwal ta nzakway ka ɲani§.» Ka lu guli na: «Inda mndu ta mnay kazlay: Ɔa Mgham Lazglafta yu kə'a ná, ka mbədanambəda tsi ta hul ta maga ghwadaka skwi,» ka'a.

<sup>20</sup> Huzla tsatsaf lu nda dasu nda ya nda ghuva tili yeya a ta slanaghata lu ma həga dagala wa. Fidatá fu sanlaha, tsatsaf nda rbisl lu ta sanlaha. Ɔa maga slna bađu gwada dagala sanlaha, Ɔa maga slna nda hamata fitik sanlaha guli. <sup>21</sup> Ka Zlanzla mndu ta maga tsa ghwadaka skwiha mnə yu ya katsi, dza'a nzakway tsa mndu ya ka guram nda huzla ta kəl lu ka ksa slna nda tsi bađu gwada dagala, ya faghu lu nda paya Ɔa maga inda slna dinadina.

*Nzanza ka vərda mnda ksa slna Mgham Yesu*

<sup>22</sup> Tsaghutsa ta vgha nda ghwadaka ndanu ya ta kumə duhwal ta magay. Zba ta tva maga skwi tdukwa, nda tva zlgħay nda ɲuduf, nda tva dvu, nda tva zɖaku kawadaga nda gwal nda ghuɓa ɲudufa taɲ, ta hga hga Mgham Lazglafta. <sup>23</sup> Ma fam kagha ta wa gha da zlərdutawiha ka bətbət, kul had hayhayani, kabga ta sabsa zlərdawi mida. <sup>24</sup> Vani ná, had mndu ta ksa slna Mgham Lazglafta ta zlərdawi wa. Katək ná, ta mamay ká inda mnduha ta tsa mndu ya, laviɲlava katsi ta taghanaftá skwi ta mnduha. Ta ksay katsi ta ɲuduf ma skwi ta mnə mnduha tida. <sup>25</sup> Nda hanatá ghəɲ katsi gwada nda gwal ta mbadanafatá gwadani. Ka waya ka skwi dza'a vlayvla Lazglafta ta tvi ta həɲ Ɔa mbadanafat taɲ ta nzakwa taɲ, Ɔa snarɲa taɲ ta kahwathwata. <sup>26</sup> Ɔa vrakta ghəɲa taɲ, Ɔa ndapta taɲ ma dəbla halaway ya si ta ksagħutá həɲ Ɔa snanatá skwi ta kumə tsi.

### 3

*Kɖavakta fitik*

---

§ 2:19 Gray nda Mbsak. 16:5.

<sup>1</sup> Wya skwi ŋa snaŋta gha: Ma kdavakta fitik ná, dza'a mamu ghuya danwa, <sup>2</sup> kabga dza'a nzakway mnduha ka gwal ta dvutá ghəŋa taŋ, ka gwal ta dvutá tsemi, ka gwal ta ghərɔaku, ta gla ghəŋ, ka gwal ta kwarakwara ta ghəŋa Lazglafta, ka gwal kul had' nzi'ŋa taŋ ta dadaha taŋ, ka gwal kul had' ta rfa mndu, ka gwal kul had' ta zləŋa Lazglafta. <sup>3</sup> Dza'a nzakway həŋ ka gwal təŋtəŋa ghəŋa taŋ, ka gwal kul had' ta tawa hidahida ta mndu, ka gwal ta tsanavatá gwada ta mndu, ka gwal kul zlahavata, ka gwal ta sidi, ka gwal ka ghuma skwi dina. <sup>4</sup> Dza'a nzakway həŋ ka gwal ta dzawaptá mndu, ka gwal ta valafta ta mndu, ka gwal ta ghərbuta ma vəl gla ghəŋ. Mal skwi ta zdəganatá həŋ dvu həŋ ka Lazglafta. <sup>5</sup> Manda va gwal ta tsəlbu ŋa Lazglafta ka həŋ ta nghə lu, ama va a həŋ ta snaŋtá mbrakwa Lazglafta wa. Ma guyə ka ta vgha nda mndərga tsa mnduha ya guli. <sup>6</sup> Mamu sanlaha mataba taŋ ta ra watgha, ka dza'a da həga da həga ga mndu da gataftá mi'aha kul had' mbrakwa taŋ, hbu dmaku ta həŋ, ta zawataku hara'utiri kavghakavgha ma ghəŋa taŋ. <sup>7</sup> Inda fitik həŋ ta tagha skwi mndani, ama trid', laviŋ a həŋ ta snaŋtá kahwathwata wa. <sup>8</sup> Manda va pghay pghə i Zanes nda Yambres ta ghəŋ ghərŋaghərŋa nda Musa ghalya ya ná, manda va tsaya ta pgha sanlaha ma tsa mnduha ya ta ghəŋ ghərŋaghərŋa nda kahwathwata. Gwal nda hwada ghwinzlak taŋ həŋ. Had' hayhaya zlghay nda ŋudufa taŋ wa. <sup>9</sup> Ama had' həŋ dza'a zaptá mtak wa. Gi dza'a nda ngha inda mnduha ta tsa tsabakwa taŋ ya, manda va tsa ŋa i Zanes nda Yambres ya.

### *Vla hidaku*

<sup>10</sup> Ama kagha, ksafksa kagha ta skwi ta taghə yu, nda tva nzakwa da, nda klatá ghəŋa slna ta magə yu, nda tva zlghay nda ŋudufa da, nda ksa ŋuduf ta ksə yu, nda ya ka

yu ta dʋutá mnduha, nda ya ka yu ta gɔ́avata. Nda sna kagha guli <sup>11</sup> ta tsa giri ya gidíp lu, nda ghuya ɔ́arwa ya ghuydíp lu ma luwa Aɳtakiya, nda ya ma luwa Ikwaniya, nda ya ma luwa Listra ya. Wati ma giri ya kul gidíptá lu na? Nduk nda tsaya ná, Lazglafta ta katagidípta ma indani\*.

<sup>12</sup> Nziya nza tsi, inda gwal ta kuma nzaku manda ya ta kumə Lazglafta ma ndi'atá vgha nda Yesu Kristi ná, dza'a ganapga lu ta iri ta həŋ. <sup>13</sup> Ama ghwadaka mnduha nda gwal nənbə mnduha ná, ta kəma ta kəma ta ɓadzakwa nzakwa tarŋ. Dza'a nənbəpnənbə həŋ ta sanlaha, dza'a nənbəpnənbə həŋ ta ghəŋa tarŋ guli. <sup>14</sup> Ama kagha, ma skwi ya taghaf ka, káka gɔ́avata. Ka fafta ka ta ghəŋa gha dar tida, kabga nda sna ka ta mndu ta taghaghaf†.

<sup>15</sup> Daga ma ga zwaŋa gha, nda sna ka ta skwi ma vindatá gwada nda ghuba ta nzakway ka gwada Lazglafta. Dza'a vlaghavla ta difil ta kla mndu da mbaku nda ma zlgħaftá Yesu nda ŋuduf. <sup>16</sup> Inda skwi nda vinda ka gwada Lazglafta ná, Lazglafta ta mnafta. Dina ŋa tagha kahwathwata, ŋa ɔ́agɳtá krughuvi, ŋa payaftá mndu, ŋa taghanaftá nzaku tɔ́ukwa ta mndu, <sup>17</sup> kada nzakwa mnda Lazglafta nda payatá vgha prək ŋa maga inda skwi ŋa maga skwi dina.

#### 4

##### *Mna ta gwada Lazglafta*

<sup>1</sup> Ka yu ta mnaghata ta kəma Lazglafta nda ya ta kəma Yesu Kristi, ya ta dza'a da tsa guma ta ghəŋa gwal nda hafu nda ya ta ghəŋa gwal nda rwa. Ka yu ta mnaghata nda ma hga sagha ya dza'a sagha Kristi, nda ya nda ma ga mghamani ná, <sup>2</sup> mna ta gwada Lazglafta, ka gdata ka

\* 3:11 Aɳtakiya (ma Pisidi,) Ikwaniya, Listra: Ngha ta Slna gwal ghunay 13-14. Mgham ma indani: Gray nda Zabura 34:20. † 3:14 Ngha ta 1:5, 2:2.

ta vrafta tida, dər ma fitikani tsi, dər ma fitikani a tsi wu. Zlaha ta gwal ta maga ghwadaka skwi, dva ta həj, vla ta mbraku ɲa taɲ, hbatá ɲuduf ka tagha ka ta skwi ɲa taɲ, <sup>3</sup> kabga mamu sana fitik dza'a sagha ɲa kwala mnduha kul snəgəltá vərɔaka tagha skwi. ɲa laghwa taɲ sna skwi ya ta kumə ghəj taɲ. ɲa laghwa taɲ da mbala ghwadaka gwal tagha skwi ɲa taghanatá skwi ya ta kumə həj. <sup>4</sup> Dza'a nu'afnu'a həj ta sləməɲa taɲ yaha həj snarjta kahwathwata, ka mbədaghutá vgha da sna tsakalawi. <sup>5</sup> Ama kagha ya, gdavagda gha ma ghunislaka gha, su'a ta ghuya danwa, magatá kahwathwata slna mndu ta mna Lfida Gwada. Kdanafkda ta slna nzakwa gha ka mnda maganata slna ta Lazglaftha.

<sup>6</sup> I'i, nda maga fitika da, taghwaɲ a yu ka mtaku wa. Ndusak ndusa fitika sli'a da. <sup>7</sup> Vulavula yu ta vərɔaka vulu, kdanakkda yu ta vərɔaka hwaya da, ɲanana yu ta zlghay nda ɲudufa da. <sup>8</sup> Ndanana, ta kzlaykzlay nisəla vəl zaktá da ta ghwa ta i'i. Tsa nisəla ya ná, zewzewa mbaku ya dza'a vlihata mnda tsa guma tdukwa, badu fitika tsa guma. ɲa da ndaghəɲa da yeya a wu, nduk nda inda gwal ta kzla dvaftá saghani.

### *Skwi nghadap Pwal kaghəɲani*

<sup>9</sup> Ka ɲavata ka ka sabi slidighata misimmisim. <sup>10</sup> Wana zlidivazla na Demaska\*, kabga laghula dvtutá skwa ghəɲa hadik, ka sli'aftá tsi ka laghwi da luwa Tesalunik. Laghula na Kresəj ta hadika Galat, ta laghu Titus ta hadika Dalmatiya guli. <sup>11</sup> Lukwa turtukwani yeya tavatá i'i. Ta sabə ka ya, ka klaganapta ka nda Markus, dza'a katay ta i'i katakata ma slna† da. <sup>12</sup> Ghunaghaghuna yu ta Tisik

\* 4:10 Demaska: Ngha ta Kwalasuha 4:14, Filimuj 24. Tit, ngha ta 2 La Kwarej 8:23, Galat 2:3, Tit 1:4. † 4:11 Lukwa: Ngha ta Kwalasuha 4:14, Filimuj 24. Markus: Ngha ta Slna gwal ghunay 12:12, 25, Kwalasuha 4:10 Filimuj 24.



da luwa Afisus<sup>‡</sup>. <sup>13</sup> Ta sabə ka ya, ka laba ka nda ma luwa Truwas, ka klagidipta ka ta lguta ghzla mtasla da ga Karpus ya. Ka klaganapta ka nda defteriha, katkatatani, tsa ka huta<sup>§</sup> ya.

<sup>14</sup> Dagala ghwadaka skwi magiha Alegzandra ta nza-kway ka dəgha. Mgham Lazglafta dza'a planamtá skwi maga\* tsi. <sup>15</sup> Kagha guli, dasuwa káka nda tsi, kabga nzanza ghərhaghərhə nda skwi ya ta mnə mu.

<sup>16</sup> Badu tanjana lagha da da guma da mbəda gwada ta ghəna da ná, had sana mndu ta katihata wu, zlidivazla hən demdem. Ma tsunus Lazglafta ta gumani ta hən. <sup>17</sup> Tsaw nzanza Mgham Lazglafta kawadaga nda i'i, ka vlihatá tsi ta mbraku, kəl yu ka kdanaktá mna gwadani, ka snarjtá inda gwal kul nzakway ka la Yahuda. Katigipkata Lazglafta guli ma wa rveri. <sup>18</sup> Nda sna yu guli ná, dza'a katigipkata Lazglafta ma inda ghwadaka skwi. Dza'a katay ta i'i na lafa da ta luwa da vla ga mghamani. Jani glaku na kdekedzen. Amin!

### *Ga zgu*

<sup>19</sup> Ka ganaghata ka ta zgu ta i Priskila, nda Akilas, nda gwal ga Unesifura<sup>†</sup> tani guli. <sup>20</sup> Ta ma luwa Kwarent na Irasta. Ma luwa Miletus zlanata yu ta Trufim kul dughwanaku<sup>‡</sup>. <sup>21</sup> Ka navata ka, ka sabi misimmisim ma kdaku fitika mazlam.

---

<sup>‡</sup> 4:12 Tesik: Ngha ta Slna gwal ghunay 20:4, Afisus 6:21. 22, Kwalasuha 4:7. 8. <sup>§</sup> 4:13 Tesik: Ngha ta Slna gwal ghunay 20:6. Delewera: Huta rini, katkatatani na tuwak, ka na gu a tsi ta payafta lu na vindi tida. \* 4:14 Alegzandra: Ngha ta 1 Timute 1:20. Mgham, skwi ya maga tsi: Grafgra nda Zabura 62:13, Mahdihdi 24:12, Ruma 2:6. <sup>†</sup> 4:19 1 Priskila nda Akila: Ngha ta Slna gwal ghunay 18:2. Unesifura: Ngha ta 1:16-17. <sup>‡</sup> 4:20 Irasta: Ngha ta Slna gwal ghunay 19:22, Ruma 16:23. Trufim: Ngha ta Slna gwal ghunay 20:4, 21:29.

Ta ga zgu i Yubulus, nda Pudeŋsa nda Linusa, nda Klawdiya, nda inda zwanama, ŋa gha.

<sup>22</sup> Ka nza Mgham Lazglafta nda kagha.

Ka nza zɗakatahuɗa Lazglafta guli nda kaghuni dem-dem!

Deftera Lfiċa Dżratawi  
New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

